



## Communicaziun da medias

### RTR avra sias portas per giuven e vegl

Cuiria, 06.11.2017 – **Ils 11 da november ha lieu a Cuiria la 11avla ediziun da la «Sonda lunga».** La chasa da medias Radiotelevision Svizra Rumantscha RTR avra per questa chaschun sias portas ed ha pront in vast ed interessant program per giuven e vegl.

La «Sonda lunga» è in punct fix en il chalender cultural dal chantun Grischun. Per in di lung da 12 uras sa preschentan divers manaschis da cultura pli pitschens e pli gronds e porschan a visitaders e visitadras attracziuns individualas. A la 11avla ediziun ha era RTR preparà in program multifar ed extraordinari. Tut ils arranschaments e tut las visitas guidadas èn per rumantsch e tudestg e da giudair tranter las 12:00 – 19:00.

#### Radio e TV live

Ils products da medias enconusch'ins sco "buccadinas" finidas e consumablas sin moniturs ed en il radio. Ma co fan ins tut las contribuziuns ch'ins vesa ed auda mintga di? RTR dat invista e mussa la lavur concreta en ils studios. Emissiuns vegnan producidas live per e cun il public e tgi che vul po collavurar davos la camera u il microfon.

#### Fufragnar en l'archiv

Ensemen cun ils collavuraturas e las collavuraturas pon las visitadras ed ils visitaders far ina retschertga davart in lieu preferì en il Grischun u tschertgar istorgias veglias en l'archiv. Pertge betg guardar sch'ins n'è eventualmain sez betg perpetnisà en ina contribuziun da radio u television? Sper retschertgar pon visitadras e visitaders era chargiar agens videos u fotos sin la nova plattform «nossaistorgia.ch». Suletta cundiziun: Ils videos ston esser digitalisads (po vegnir fatg al lieu).

#### Zambregiar in radio DAB+

Tgi ch'è pli vegl che 12 onns po construir tar RTR durant la «Sonda lunga» ses agen radio DAB+. Trais lavuratori porschan plaz a diesch personas. Ma er per pli giuvens datti attracziuns: Il moderatur da RTR Sergio Guetg è en cuschina e fa cun uffants tranter 5 e 10 onns stailas dulsthas e saladas.

#### Musica e lirica

Sa chapescha che musica e texts rumantschs n'astgan betg mancar ad in tal arranschament. I dat gist pliras chaschuns d'entupar artists indigens: La chantautura da 18 onns Chiara Jacomet preschenta chanzuns da ses album nov "Masra". Severin Brugger e Laura Loretz preschentan lur simbiosa da musica multifara e lirica en il dialect tuatschin.

La survista da tut las attracziuns chattais Vus online sut [www.langersamstag.ch/programm](http://www.langersamstag.ch/programm) ed el carnet da program.

#### Dapli infurmaziuns

Radiotelevision Svizra Rumantscha, Via da Masans 2, 7000 Cuiria  
Diana Jörg, diana.joerg@rtr.ch, tel. 081 255 76 29, diana.joerg@rtr.ch